

BARAZA LA WAWAKILISHI ZANZIBAR

Simu Nam. + 255 24 2230602/1
Fax Nam. + 255 24 2230215
Towuti: www.zanzibarassembly.gov.tz



SANDUKU LA BARUA 902
ZANZIBAR
Barua Pepe: zahore@zanlink.com

HOTUBA YA KAMATI YA MIFUGO, UTALII, UWEZESHAJI NA HABARI YA BARAZA LA WAWAKILISHI KUHUSU MSWADA WA KUANZISHA BARAZA LA SENSA YA FILAMU NA UTAMADUNI ZANZIBAR NA MAMBO MENGINE YANAYOHUSIANA NA HAYO

UTANGULIZI

Mheshimiwa Spika,

Awali ya yote napenda kumshukuru Mwenyezi Mungu kwa kunipa uwezo wa kusimama mbele ya Baraza lako tukufu nikiwa mzima wa afya ili kuwasilisha mchango wa Kamati ya Mifugo, Utalii, Uvezeshaji na Habari kuhusu Mswada wa Kuanzisha Baraza la Sensa ya Filamu na Utamaduni Zanzibar na Mambo Mengine Yanayohusiana na hayo.

Mheshimiwa Spika,

Aidha, napenda kumshukuru Mwenyezi Mungu kwa kutujalia afya njema Wajumbe wa Baraza lako tukufu kuweza kukutana tena leo hii ili kuujadili na hatimae kuupitisha Mswada huu kwa lengo la kulinda na kuendeleza utamaduni wetu hapa Zanzibar.

Mheshimiwa Spika,

Shukrani zangu pia ziwafikie wajumbe wa Kamati na makatibu wa Kamati, watendaji wa Wizara ya Habari, Utamaduni, Utalii na Michezo pamoja na Wanasheria wetu wa Baraza na Serikali kwa mashirikiano ya kutosha kwa kutoa michango na kutupa ufanunuzi wa baadhi ya mambo wakati wa kuupitia na kuuchangia Mswada huu.

Mheshimiwa Spika,

Kwa niaba ya Wajumbe wa Kamati ya Mifugo, Utalii, Uwezeshaji na Habari napenda kuchukua fursa hii kuungana na wenzetu kumuombea dua na kutoa mkono wa pole kwa ndugu na jamaa wote kwa kifo cha aliyekuwa Mjumbe wa Baraza la Wawakilishi wa Jimbo la Magomeni marehemu Salmini Awadh Salmin kilichotokea hivi karibuni. Mungu awajalie subra familia, ndugu na jamaa wote wa marehemu pamoja na kuilaza roho ya marehemu malazi pema Peponi. Amin.

Mheshimiwan Spika,

Ni vyema kuwatambua Wajumbe wa Kamati ambao walihusika kwa namna moja au nyengine kuupitia Mswada wa Sheria ya Kuanzisha Baraza la Sensa ya Filamu na Utamaduni Zanzibar. Wajumbe hao ni :-

- | | | |
|--------------------------------|---|-------------------|
| 1. Mhe. Mlinde Mabrouk Juma | - | Mwenyekiti |
| 2. Mhe. Abdallah Mohammed Ali | - | Makamu Mwenyekiti |
| 3. Mhe. Asha Bakari Makame | - | Mjumbe |
| 4. Mhe. Assa Othman Hamad | - | Mjumbe |
| 5. Mhe. Amina Iddi Mabrouk | - | Mjumbe |
| 6. Mhe. Mussa Ali Hassan | - | Mjumbe |
| 7. Mhe. Mohammedraza Hassanali | - | Mjumbe |
| 8. Mhe. Kazija Khamis Kona | - | Mjumbe |
| 9. Ndg. Himid Haji Choko | - | Katibu |
| 10. Ndg. Salum Khamis Rashid | - | Katibu |

Mheshimiwa Spika,

Madhumuni ya kuletwa Mswada huu ni kufuta Sheria Nambari 6 ya 1983 ya Baraza la Sanaa na Sheria ya Nambari 1 ya 2009 ya Bodi ya Sensa ya Filamu na Utamaduni kwa lengo la kuanzisha Sheria Mpya ya Baraza la Sanaa na Sensa ya Filamu na Utamaduni Zanzibar itakayosimamia vyema na kwa ufanisi zaidi majukumu ya kulinda, kuhifadhi na kudumisha mila, silka na maadili mema ya Wazanzibari na kuutumia Utamaduni kama njia bora ya kupunguza umasikini.

Mheshimiwa Spika,

Hapo awali sheria zilizokuwepo zili kuwa na malengo sawa ya kuanzishwa kwa Sheria hii, lakini kwa sababu ya maendeleo ya kiuchumi, kiutamaduni, kijamii na hata ya kisayansi na teknolojia Sheria zilizokuwepo zimeonekana kushindwa kusimamia vyema mabadiliko hayo yanayotokea siku hadi siku.

Mheshimiwa Spika,

Kamati yetu inakiri kuwa ni kweli utamaduni na maadili yetu yanazidi kuperomoka siku hadi siku kutokana na mabadiliko yanayotokea katika nyanja tofauti ndani ya jamii yetu, na athari zake zinaonekana katika rika zote watoto na vijana ambaa ndio tegemeo la taifa la kesho. Kamati yetu inaunga mkono Serikali kuona kuwa ipo haja ya kuanzisha Sheria mpya ambayo itaendana na mabadiliko yote yanayotokea katika jamii yetu ili kulinda, kuhifadhi na kudumisha mila, silka na maadili mema ya Wazanzibari.

Mheshimiwa Spika,

Aidha, Mswada huu Waheshimiwa Wajumbe wa Baraza lako tukufu wakiupitisha pia utasaidia kulinda heshima ya Zanzibar kama ilivyokuwa hapo zamani katika suala zima la Utamaduni ambayo inaendelea kupotea kwa kasi kubwa katika jamii yetu na hivyo kuanza kupoteza heshima ya Wazanzibari. Ni dhahiri na ni jambo lisilopingika kuwa utamaduni na maadili ya Wazanzibari yanazidi kuperomoka, na kuperomoka kwa maadili yetu ni kuipoteza heshima ya Wazanzibari amabyo inasifikasi ulimwenguni kote.

Mheshimiwa Spika,

Kamati inaitaka Serikali katika kutekeleza Sheria hii ihakikishe kwamba maeneo yote yanayohusika na aidha maonesho ya taarabu au ngoma zozote zile au maeneo yanayopigwa disco hususan katika maeneo ya kambi za majeshi au polisi au vikosi yanafuata masharti ya Sheria hii na Kanuni zake, kwa sababu inaonekana kuwa ni maeneo ambayo yako huru sana na jambo kubwa zaidi ni kuwa vijana wetu huwa wanakwenda sana katika maeneo hayo.

Mheshimiwa Spika,

Kamati inasisitiza sana kuwa, kwakuwa Mswada huu umekuja kufuta Sheria Nambari 6 ya 1983 ya Baraza la Sanaa na Sheria ya Nambari 1 ya 2009 ya Bodi ya Senza ya Filamu na Utamaduni kwa sababu ya kushindwa kukidhi mahitaji kulingana na mabadiliko yanayotokea katika jamii yetu, sasa kwa Sheria hii inayokuja tuone kuwa ni kweli imekidhi haja ya kukabiliana na mabadiliko hayo katika jamii yetu na ni kweli kuwa kulikuwa na haja ya kufuta Sheria hizo.

Mheshimiwa Spika,

Kimsingi kamati yetu imeukubali na kuunga mkono Mswada huu, hata hivyo imefanya marekebisho katika baadhi ya vifungu kwa lengo la kusaidia kuboresha Mswada huu. Marekebisho hayo ni ya kimaandishi na yale ya kuongeza au kuindoa maneno katika baadhi ya vifungu.

Mheshimiwa Spika,

Wizara baada ya kushauriana na Kamati iliona ni vyema kwakuwa mswada ulikuwa na marekebisho mengi kutoa nakala nyengine mpya ya Mswada ambao utajumuisha marekebisho ya Wizara na ya Kamati, lakini hata hivyo naomba nieleze baadhi ya marekebisho ya msingi ambayo Kamati inaona yangelifaa.

Mheshimiwa Spika,

kwanza Kamati imependekeza katika Jina refu la Mswada huu lisomeke:

“MSWADA WA KUFUTA SHERIA YA BARAZA LA SANAA NA MUZIKI, NAMBA 6 YA 1983 NA SHERIA YA KUANZISHA BODI YA SENZA YA FILAMU NA SANAA ZA MAONESHO, NAMBA 1 YA 2009 NA KUANZISHA SHERIA MPYA YA BARAZA LA SANAA NA SENZA YA FILAMU NA UTAMADUNI ZANZIBAR NA MAMBO MENGINE YANAYOHUSIANA NA HAYO”.

Sababu za mapendekezo haya, tunafahamu kuwa kwa mujibu wa Sheria ya Tafsiri Namba 7 ya 1984, kifungu cha 10 kinaeleza kuwa; jina refu sio sehemu ya Sheria. Licha ya kuwa jina refu sio sehemu ya Sheria lakini madhumuni makuu ya kuweka jina refu kwenye Sheria ni kutoa maelezo kwa urefu yanayohusu Sheria hiyo ili

kumuwezesha msomaji kwa kusoma jina hilo kuelewa malengo makuu ya kuanzishwa Sheria hiyo.

Mheshimiwa Spika,

katika kifungu cha 48 kinachosomeka “ *Iwapo mtu ye yote akithibitika kutenda kosa chini ya Sheria hii, Baraza litataifisha na ku haribu vifaa vyote vinavyohusiana na picha za ngono*”.

Katika kifungu hiki kamati ilipendekeza marekebisho kwani Baraza halitakuwa na uwezo wa kutaifisha au ku haribu vifaa hivyo na badala yake huo ni uwezo Mahakama. Kwahivyo kamati ilipendekeza isomeke kama ifuatavyo “*Iwapo mtu ye yote akithibitika kutenda kosa chini ya Sheria hii, na iwapo akipatikana na hatia, Mahakama itataifisha na ku haribu vifaa vyote vinavyohusiana na picha za ngono*.”

Mheshimiwa Spika,

kwa mara nyengine tena napenda kukushukuru kwa kunipa nafasi hii kusimama mbele ya Baraza lako ili kuwasilisha maoni ya Kamati na tunaimani Waheshimiwa Wajumbe watauchangia, wataujadili na hatimae kuupitisha Mswada huu kwa lengo la kuuboresha.

.....

Mlinde Mabruok Juma,

Mweyekiti,

Kamati ya Mifugo, Utalii, Uwezesaji na Habari,

Baraza la Wawakilishi.

Zanzibar.